

Danovamain ina surpraisa?

Tir final grischun da gruppas

DA GION NUTEGN STGIER / ANR

■ Damaun vegnan eruidas a Cuira las gruppas che daventan campiunessas grischunas sin la distanza da 300 meters e sin las distanzas da 25 e 50 meters. Sin la distanza lunga han las gruppas da Favugn e da Bregaglia da defender lur titel. Omduas èn suenten las duas prerundas chantunalas er a la testa da la rangaziun.

Strusch che la stagiun da tir ha cumenzà en il Grischun stat già in dals puncts culminants da l'onn sin il program. Quai è il final grischun da gruppas nua che l'elita chantunala cumbatta per puncts e per onur. En il final al Rossboden a Cuira cumenza tut da nov e cun excepziun dals tiradurs da Cuira profiteschan nagins dal bonus da sajettar sin il stan da chasa. Las duas prerundas da qualificaziun han las gruppas a mintgamai tschintg tiradurs anc sajettà èn lur agens stans nua ch'els enconuschan bain relaziuns e perspectiva. Tar il final da gruppas vegnan betg mo eruids ils campiuns grischuns da las societads da tir, mabain vegnan er eruidas quellas gruppas da noss chantun che sa partitipeschan a l'emprima da trais rundas naziunalas. A l'entschatta da settember ha lura lieu a Türitg il final naziunal nua che las pli fermas gruppas da la Svizra cumbattan per il titel da campiun svizzer.

Sent, Tumeigl, Castrisch u tuttina Bregaglia?

Da las 53 gruppas che han tratg las duas prerundas da qualificaziun cun l'arma da militar èn a la fin sa qualificadas per il final 24 gruppas. Suenten quellas duas è la gruppa da



Damaun ha lieu il tir final grischun da gruppas al Rossboden a Cuira.

FOTO G. N. STGIER

Bregaglia a la testa da la rangaziun e quai cun in total da 1378 puncts. Quella gruppa aveva tar il final 2014 procurà per la pli gronda surpraisa cun gudagnar la concorrenza en la categoria D. Quest onn damai èn ils tschintg tiradurs da la Bregaglia ils favorits cun avair da defender lur victoria da l'onn passà. Las gruppas da Sent, da Tumeigl e segir er da Castrisch èn dentant gronds concurrents cun tuttas trais già esser stadas campiunessas grischunas en quella categoria e duas er anc campiunessas svizras. Da quintar è bain er cun la gruppa da Schiers/Aschera che ha tratg en la segunda prerunda da qualificaziun cun 702 puncts in resultat excellent.

Vegn la gruppa da Ruschein danovamain sin il podest?

En la categoria A, quella cun l'arma da sport, cumbattan 17 gruppas per esser a la fin il plisum il podest. Tar ils gronds favorits tut-

gan er quest onn ils tschintg tiradurs da la gruppa da Favugn che han già gudagnà il davos final. La gruppa da Favugn è er la victura da las duas prerundas da qualificaziun e quai cun in total da 1927 puncts. Tar il final 2014 èn ils tiradurs da Haldenstein vegnids vicecampiuns grischuns ed er da preschent tutgan els tar ils pli gronds concurrents da la gruppa da Favugn. Cun la gruppa dad Andeer èsi dentant er adina da quintar, er sche actualmain è ella betg uschè ferma sco anc avant onns. Tar il final 2014 aveva la gruppa da Ruschein procurà cun il terz post per ina pitschna surpraisa. Tgunsch pussaivel che damaun èn ils tschintg tiradurs danovamain tranter ils megliers. Onur per la Surselva vegnan segir er a far las gruppas da Sumvitg e da Laax-Falera. Sin la distanza da 25 e 50 meters èn segir ils tiradurs da Cuira ils favorits, però er quels da Müstair han ambiziuns da persvader en il final.